



Kerajaan Perak junjung kasih atas pemilihan Sultan Nazrin

Oktober 27, 2023 @ 8:26pm

GERIK: Kerajaan Perak menjunjung kasih kepada Raja-Raja Melayu yang memilih Sultan Perak Sultan Nazrin Muizzuddin Shah sebagai Timbalan Yang di-Pertuan Agong, bagi tempoh lima tahun, berkuat kuasa 31 Januari tahun depan.

Menteri Besar, Datuk Seri Saarani Mohamad, berkata pemilihan itu satu berita gembira buat seluruh rakyat negeri Perak.

"Kami mendoakan semoga Allah sentiasa merahmati dan memberi petunjuk dan hidayahnya kepada Paduka Seri Sultan Perak, untuk menjalankan tugas baginda sebagai Timbalan Yang di-Pertuan Agong," katanya.

Beliau bercakap kepada pemberita selepas menyampaikan bantuan cermin mata bagi Program Yayasan Perak Eye Sinar 2023, di sini hari ini.

Penyimpan Mohor Besar Raja-Raja, Tan Sri Syed Daniyal Syed Ahmad dalam kenyataan memaklumkan, Sultan Johor, Sultan Ibrahim Almarhum Sultan Iskandar hari ini dipilih sebagai Yang di-Pertuan Agong ke-17, bagi tempoh lima tahun berkuat kuasa 31 Januari 2024, pada Mesyuarat Majlis Raja-Raja ke-263 (Khas) di Istana Negara, hari ini.

Sultan Ibrahim akan menggantikan Al-Sultan Abdullah Ri'ayatuddin Al-Mustafa Billah Shah yang bakal menamatkan tempoh pemerintahan pada 30 Januari tahun depan.

Mesyuarat itu turut memilih Sultan Nazrin sebagai Timbalan Yang di-Pertuan Agong bagi tempoh sama. – BERNAMA